

Petersen Dyggve

I.

De la joie que desir tant
d'Amors, qui m'a a soi tourné,
ne puis leissier que je chant
puiz que ma dame vient a gré,
en cui j'ai mis cuer et pensé
a trestoute ma vie;
maiz trop me font anui de lé
cil cui Diex maleïe.

II.

A tel faiz joie sans talent,
por s'amor, que de mon cuer hé:
felon, anuieuz, mesdisant
dont deable font tel plenté
que trestoute lor poesté
tournent en felenie,
qu'ançoiz sunt de mal apensé
que l'amour soit jehie.

III.

Petit puet lor guerre valoir,
quant ma dame voudra amer,
et s'ele a talent ne voloir
du plus loial ami trover
qui soit, dont me puis je vanter,
qu'a haute honeur d'amie
ne porroit nus a moi monter
pour nule seignourie.

IV.

Se Longue Atente et Bon Espoir
ne me font joie recouvrer,
dont m'ont Amours trahi pour voir,
car touz jours le m'ont fet cuider;
maiz uns ris m'en doit conforter
qui mainte ame a trahie;
et si sai qu'en desesperer
a orgueill et folie.

V.

Bele douce dame, merci

de moi qui ainc maiz ne fui priz
d'Amours, maiz or m'en est einsì
qu'a tous amans m'en aatiz.
de cuer vous proi volenteiz
qu'en vostre compaignie
m'acueilliez ainz qu'il m'en soit piz
par felenesse envie.

VI.

Dame, mout ai petit servi
a tel don con je vous ai quis,
maiz mes cuers m'a vers vous plevi
d'estre li pluz loiauz amis
del mont, et si serai touz dis,
qu'Amours ai si saisie
que nus n'en a point, ce m'est vis,
tant que l'aie, partie.

VII.

Odin proi et mant et devis
que ceste chanson die
a ciaus qu'il savra ententiz
d'amer sanz tricherie.

- letto 590 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/petersen-dyggve-23>